



MOLAETSA OA KEREMESE

OA MOHLOMPHEHI TONAKHOLO MOEKETSI MAJORO

25 Tsitoe 2020

Maseru Lesotho

1. Selekela

- 1.1 Motlotlehi Rabasotho ke u hlomphele Ntate, 'me e mpe ebe ka uena ke hlomphele bohle ba lokeloang ke hlonpho. Kea le lumelisa chaba sa Thesele, lona ba ntseng ba le koano le lona ba sa tsoa kena ho tloha Aforeka Boroa le linaheng tse ling. Ke etsa puo kajeno:
- (a) ho beha Basotho leseling ka litaba tsa Covid-19 le boipaballo nakong ena ea kerešemese le ketekelo ea selemo se secha;
 - (b) ho beha Basotho leseling ka mesebetsi ea 'Musu ho tloha re nkile marapo a puso ho fihlela ha joale;
 - (c) ho lakaletsa Basotho ketekelo ea Kerešemese e monate le mahlohonolo a selemo se secha.

Bohle re ea tseba hore selemong sena phephetso e bile kholo bophethahatsing ba meralo le merero e mengata ea linaha ka ho fapakana ka lebaka la kokoana hloko ea Corona Virus.

2. Seoa sa Covid-19 le toantšo ea sona

- 2.1 Sechaba sa heso e re ke le hopotse hore naha ea rona e ntse e le tlasa khatello ea seoa sena sa Covid-19, 'me 'Musu o ntse o tsoela pela ho se loantša ka matla. Ho latela sekala sa rona sa tšoetso ea Covid-19, lipalo tsa batho ba ntseng tšoetsoa li bonahala li nyoloha. Ke bontše hore ka la 11/12/2020 batho ba fumanoeng ba ena le tšoetso e ne le 2,214 holima lihlahlobo tse 27,791 tse phethetsoeng empa ka nako ea beke feela tšoetso ea nyoloha ho ka makholo a mararo. Ka la 18/12/2020 lipalo tsena li ne li se li nyolohetse ho 2,546 holima lihlahlobo tse 30,486 tse phethetsoeng.
- 2.2 Ke le hopotsa hore ho latela sekala ea rona sa toantšo ea lefu lena re 'maleng o moputsoa leha litlaleho tsa morao-rao li supa hore sekahla sa tšoetso se boetse sea phahama 'me re ka iphumana re le 'maleng o mopinki ha feela re itumeletse ho tšoetsoa.
- 2.3 Ho loantša seoa sena, 'Musu o ile oa aba chelete e kalo M698 million. Chelete ena e ntse e sebelisoa ho phethahatsa merero ea toantšo ea sona. Ka tšebeliso 'moho le Sitsi sa Pokello ea Lekhetso (LRA), 'musu o boetse oa khahlametsa bahoebi ka chelete e M56 million e le ho fokotsa melato ea khiro ea matlo a tšebetso nakong ea Covid-19. 'Musu o ile oa boela oa kena lipuisanong tsa hore sechaba se theoleloe litefo mafapheng a latelang; libanka ntlheng ea likalimo (kamokhoa oa payment holidays), li-inshoreense, le mafapha a phano ea lisebelisuo tsa marang-rang, le ho theola kuno ea tšebeliso ea chelete ka marang-rang. 'Musu o ile oa boela oa khahlametsa basebetsi ba lifeme ka chelete e feteng limilione tse fetang lekholo le mashome a mabeli ho ba ema nokeng nakong ea khoeli tse tharo.
- 2.4 Ka tšebetso ea Bo-Rakhoebo ba Basotho le bafani ba bang, 'Musu o ahile litsi tse peli tsa ho hlalobela lefu lena mane Lepereng Maseru le seterekeng sa Berea.

- 2.5 Litsebi tsa bophelo li re hlokomelisa hore lefatše le kene mokhahlelong oa bobeli oa seoa sena sa Covid-19, ‘me linaha tse ngata li se li qalile ho khina metsamao ele ho qoba sekahla sa tšoaetso nakong ena ea leqhubu la bobeli.
- 2.6 **Basotho ba heso ke ipiletsa ke hona hore re lokela ho latela methati ea ho** itsireletsa ka bo mong, malapeng, metseng le naha ka kakaretso. Ke boetse ke rata ho ipiletsa ho bohle ho ela hloko methati eohle ea boipaballo joalo ka ho roala semonkoana, ho hlapa matsoho khafetsa ka metsi a phallang le sesepa, esita le ho sebelisa senyanyatsi. Ke ea tseba hore ke nako ea mekete le meketjana esita le likopano tsa malapa empa ke boela ke ipiletsa ho lona hore le ele hloko lipallo tsa Covid-19 molemong oa maphelo a lona. Le qobe ho khobokana ka bongata hobane ke hona moo tšoaetso e tla ja setsi. Moo e bang ha hona mokhoa oa ho qoba likopano, ke eletsa hore le sebelise libaka tse bulehileng, ‘me likopano tseo e be tsa nako e khutšoane haholo. Ke ha feela re ka ra ikobela lipallo tsa Covid-19 re tlang hlola lefu lena.
- 2.7 **‘Muso o lemohele qholotso e kannang ea bakoa ke ho kena ka tsela e sa** laoleheng hoa Basotho ba habo rona ka likhoroana tsa matsa. Ke ipiletsa ho Marena, Babusi ba Puso ea Libaka le Sechaba ho tlaleha batho ba joalo e le ho qobisa Sechaba tšoaetso ea Covid-19. ‘Muso o nolofalitse litsela tsa ho kena malibohong a naha e le ho akofisa hore bohle re tle re atlehe ho keteka le ba malapa a rona nakong ena ea matsatsi a Keresemese le mafelo a selemo.
- 2.8 Ke ipiletsa ke hona hore bohle ba kenang malibohong ba ikobele tataiso ea litsebi tsa bophelo tse teng moo malibohong ‘me ba ikamahanye le lipehelo tsa Covid-19. Re le ‘muso re kopile mafapha ohle a tšireletso ho ba seli ho laola bohle ba tšelang ka khoroana tsa matsa ho ba isa litsing tsa hlahlobo.

3. Merero ea ntlafatso le bophethahatsi ba eona

- 3.1 Sechaba sa heso, le tla hopola hore ka la 17 Loetse 2020, ke ile ka fana ka taelo ho makala a ‘Muso ho akofisa phethahatso ea merero ea ntlafatso e mashome a mabeli a metso e mehlano (25) e neng li kikitselela. Ke motlotlo kajeno ho phatlalatsa hore merero e tšeletseng (6) e phethetsoe. Eona e kenyeletsa e latelang:
- (a) Morero oa khokahanyo ea motlakase oa ha Makopela;
 - (b) Ho Kenya motlakase setsing sa bophelo sa ‘Melikane;
 - (c) Tokiso ea tsela ea Mpiti ho ea Ha Sekake;
 - (d) Khaho ea Setsi sa tsoaliso ea likhutšoane Quthing;
 - (e) Morero oa motlakase oa Ha Koali;
 - (f) Tlhoekiso ea lenane la meputso ea basebeletsi ba Sechaba.
- 3.2 Khatelo pele e ntle haholo mererong ea ntlafatso e leshome le motso o le mong (11) eo ke lebeletsoeng hore e be e phethetsoe mathoasong a selemo se tlang sa 2021. Hara e meng re ka supa e latelang:
- (a) Khokahanyo ea motlakase ea Ha Sephapho le Ha Thaabe;

- (b) Tokisetso ea ho buloa hoa litsi tsa meroho le litholoana tsa Ha Tikoe le Tsikoane;
- (c) Khokelo ea metsi le motlakase setsing sa lifeme sa Ha Belo;
- (d) Morero oa matloana a ntlafalitsoeng Ha Sekheeke;
- (e) Tokisetso ea ho buloa hoa lekhlotla la Tšifa-li-Mali Leribe.

3.3 Sechaba sa heso, leha e le mona ho bonahala khatelo-pele e bile teng holim'a merero ena ea ntlafatso, re bile le liqholotso mererong e robeli (8) ka mabaka a 'maloa ho kenyeletsa tlhokahalo ea lichelete le linyeoe tse ka makhotleng. Leha hole joalo, re tla tsoela-pele ho etsa sohle se matleng a rona ho fumana tharollo liqholotsong tsena.

4. Tlhopho-bocha ea Melao le Litsi tsa Naha

4.1 Basotho ba heso le tla hopola hore naha ea rona e ntse e le leetong la tlhopho bocha ea melao esitana le Litsi tsa Naha le qalileng ka selemo sa 2017. Leeto lena ha re le phethela, re hopotse hore re tlabe re hliphile bocha melao le litsi mafapheng a supileng. Oona ke ana a latelang: Molao oa Motheo, Paramente, Litaba tsa Toka, Tšireletso, Bohlanka ba Sechaba, Moruo, le Bophatlalatsi. Ho feta mona tlhopho-bocha ena e reretsoe hore e re tsoalle meralo kapa litsi tse tlang ho re bopela khotso ea moshoelella, botsitso, bonngoe le poelano ka hare ho sechaba sena sa Morena Moshoeshe.

4.2 Ka khoeli ea bobeli selemong sona sena, Lekhotla la Tlhopho-Bocha (NRA) le ile la hlomamisoa. Leha ho bile le liqholotso, Lekhotla lena le atlehile ho fihlela meoloane e latelang:

- (a) Bahlanka ba phethahatso ba se ba hloauoe 'me ke lebeletse hore ba tla tekenela tumellano ea mosebetsi haufinyane. Basotho le lipaki tsa tšebetso ena kaha e ile ea etsoa phatlalatsa.
- (b) Khiri ea basebeletsi ba bang ba lekhlotla ho tloha ka la 07/12/2020 'me tebello ke hore ho tloha ka pherekhong selemong sa 2021 lekhlotla joale le tla kena tšebetsong ka matla;
- (c) Lekhotla le tla be le phethetse khiri ea Bohlanka bo ka sehloohong le Litsibi tse tla thusa ka bophethahatsi pele khoeli ena e holimo e feela;
- (d) Lekhotla le bile le lipuisano le Mokhatlo oa Commonwealth le oa African Union ho tlatsetsa ka litsibi mafapheng a litaba tsa Molao oa Motheo, Paramente, Bohlanka ba Sechaba, 'moho le Tšireletso. Litsibi tsena li lebelletsoe ho fihla Lesotho ho tla qala tšebetso khoeling ena e tlang ea Pherekhong.
- (e) NRA e se e entse moralo oa ho phethahatsa litaba-tabelo tsa Basotho tse phuthetsoeng ka hare ho Tlaleho ea 'Moka oa Sechaba oa Bobeli (Plenary II Report).

4.3 Ke rata ho nka monyetla ona ho le hopotsa hore tlhopho bocha ke boikarabello ba Mosotho e mong le e mong ka hona bohle ha re tlatsetseng moo re ka tsebang ho etsa joalo. Mafapha

ohle a amehannng tabeng tsa tlhopho bocha a tšoere ka thata ho batla methati eo re lokelang ho e nka re le naha molemong oa ho fumana khotso ea moshoelella. Ke rata ho leboha lekhotla la likereke (CCL) le bohle bao taba ea ho fumanela Sechaba sena khotso e leng ea bohlokoa lipelong tsa bona. Ke rata ho kopa baetapele bohle ba mekha le makhotla a lipolotiki ho kopana mooho hore morero ona oa tlhopho bocha o atlehe molemong oa Sechaba sa Basotho.

5. Tsosoloso ea botsitso ka hare ho Sepolesa

- 5.1 Ha ke lemoha le ho hlokomela tsitsipano kahare ho sepolesa sa rona, ke ile ka etsa qeto ea ho khetha komisi ea lipatlisiso eo ke ileng ka e theha ka matona a latelang: Letona la Toka le Molao, Letona la Tšireletso, Letona Ofising ea Tonakholo le Letona la Sepelesa.
- 5.2 Komisi e fane ka tlaleho eo ke se ke bile ke e phatlalletitse Sechaba, me e supile ka kotloloho lintlha tse hlokang ho lokisoa ka pele-pele ka hare ho sepolesa. ‘Musu oa heso o qalile ho lokisetsa tlhopho bocha ea sepolesa ho fenyha bothata boteng kahara sona. Tlaleho ena e supa ka ho otloleha hore e ‘ngoe ea lintho tse hlokisang sepolesa botsitso ke ho itšunya-tšunya hoa bapolotiki ba Lesotho ka har’a litaba tsa sepolesa. Ke ipiletsa ho lona bo mphato ba ka polotiking ho khutla mekhoeng; lesang sepolesa se sebeletse Sechaba sena sa Basotho ka botšepahi.

6. Toantšo ea theko le thekisetano ea Batho (human trafficking)

- 6.1 Basotho ba heso, ruri ke bomalimabe hore e be kajeno naha ea rona e balloa hara linaha tse hoebang ka batho haholo basali le banana. Taba ena ha e tlose seriti ea naha feela empa ebile ke tlolo ea molao. Ka hona ‘musu o thehile komitjana ea lekhotla la matona ho loantša tlolo ena ea molao ea theko le thekisetano ea batho.
- 6.2 ‘Musu o atlehile ho hlomathisa molao oa “Anti-Trafficking Act 2011” oo ka ona o arabelang qholotso ena. Lekala la tsa Lehae ka tšebeliso ‘moho le sepolesa le thehile lefapha le bitsoang “Antitrafficking and Migrants’ Control” ho laola ho kena le ho tsoa ha melata ka hara naha ele ho thibela thekisetano ena ea batho.
- 6.3 ‘Musu o thehile likomitjana tsa thibelo le qoso ea tlolo ena ea molao le ho sireletsa mahlatsipa ea eona. Likomitjana tsena li se li kene tšebetsong.
- 6.4 ‘Musu o boetse o nkile mehato ea ho batla litsibi ho bopa maano a tlhokomeliso ea khoebisano ka batho estita le ho lisa bophethahatsi ba ona.
- 6.5 Ho phethahatsa maano ana, ‘Musu ka Lekala la tsa Lehae o se o tšoere batho ba supileng (7) le ho khutlisa ba leshome le metso e ‘meli (12) ba melata e keneng ka hara naha ka thoko ho molao. ‘Musu o tla tsoela pele ho nka likhato tse matla toantšong ea theko le thekisetano ea batho.

7. Tlhekefetso

- 7.1 Basotho ba heso, re le ‘muso re tšoenyehile haholo ke litlaleho tsa liketsahalo tsa tlhekefetso ea maqeku, basali le bana. Ele ho loantša botlokotsebe bona ke se ke laetse litsi tsa tšireletso ho hata ka thata tabeng ena. Re sa tsoa tšoea letsatsi la letšolo la matsatsi a leshome le metso e tšeletseng ho nena tlhekefetso ‘me ra boela ra thakhola Leano la Tekano 2018/2030. Ra fana ka koetliso ho baetapele ba likereke, ba moetlo le ba puso ea libaka ka litaba tsa likamano tsa tekano e le ho loantša sekhobo sena. Ho sa le joalo ‘muso o ile oa fana ka tlabollo ho basali ba 40 esita le ho tsoelapele ho hlokomela mahlatsipa a tlhekefetso a 44.
- 7.2 Re ile ra tšoara melutsoane e 38 ea basali moo ho neng ho tšohloa bohlokoa, le boikarabello ba bona malapeng le ho banna ba bona. Ke mona moo re ileng ra aba leruo la likhoho tse likete tse tharo (3,000) literekeng tse hlano tsa Botha-Bothe, Quthing, Thaba Tseka, Mafeteng le Maseru.
- 7.3 Re le ‘muso re keke ra soaso ka taba ena ea tlhekefetso hohang. Ke rata ho hoeletsa bontate le bahlankana hore ha re nkeng boikarabello ho sireletsa bana, basali le baroetsana khahlanong le likoeta tsena tse ba hlorisang. ‘Moho re tla hlola sekhobo sena.

8. Lenaneo la Khiri ea Bacha (Youth Employment Program)

- 8.1 **Basotho ba heso naha ea rona e tobane le qholotso e kholo ea tlhokahalo** ea mesebetsi, ‘me taba ena e amme bacha haholo. Ka hona ‘muso o mothating oa ho phethela moralo oa lenaneo la khiri ea Bacha. Lenaneo lena le mekhahlelo e mene bonyane:
- (a) Mokhahlelo oa pele ke khiri ea bacha ka mesebetsi e kenyeletsang khaho ea litsela le marokho, ho kata ea mangope, temo ea lifate le tse ling.
 - (b) Mokhahlelo oa bobeli o kenyeletsa koetliso ea nakoana ea bacha e le ho chorisa litsebo tsa bona tšebetsong;
 - (c) Mokhahlelo oa boraro ke ho ntlafatla likhoebo tse nyane ka botataisi le lithupelo esita le kholiso ea tsona likhoebo tseo molemong oa bacha;
 - (d) Mokhahlelo oa bone ke ho theha letlole le tlo tšehetsa likhoebo tsa bacha tseo eleng hona li qalang.
- 8.2 Karolo ea mantlha ea morero ona e se e ntse e tsoela pele, ‘me ho se ho hiriloa bacha ba sekete le makholo a mane le mashome a mahlano (1,450) naha bophara. Ke se ke laetse Letona la Lichelete hore khiri ea bacha tlasa morero ona o renetsoang ka hore ke “Lihalahala” e nyolohele ho likete tse robeli pele khoeli ea Tlhakubele e kolumela.
- 8.3 Phethahatsong ea morero ona, ‘muso o tla sebetsa le mafapha a fapaneng ho kenyeletsa likhoebo tse ikemetseng, bafani, mekhatlo ea machaba le Sechaba ka kakaretso. ‘Muso o rerile ho tla nyolla ka matla mothamo oa khiri morerong ona.

9. Kanetso le tlhahiso ea lijo

- 9.1 Basotho ba heso le tla hopola hore lefu lena la Covid-19 le fihlile re se ntse re le tlasa koluo ea tlala e bakiloeng ke komello ea lilemo tse fitileng. Ka hona re le ‘muso re ile ra fihlela qeto ea ho tšehetsa Basotho ho hlaisa lijo molemong oa ho hlola tlala. ‘Muso o tšehilitse lihoai ka karolo ea mashome a tseletseng lekholong (60%) thekong ea lipeo le menotsa, ha lekoete le tsehelitsoe ka mashome a mahlano lekholong (50%), ‘me chelete e ileng ea sebetsa mona e bile limilione tse lekholo tsa maloti (M100 million).
- 9.2 Leha ho le joalo ke tlameha ho amohela hore ho bile le liqholotso tse boima malebana le ho fumanela Basotho manyolo le lipeo ka nako hoo nako ea ho jala e bileng ea feta. Ka liphoso tsena re ithutile hore tšebetso ea temo le lisebelisuo tsa eona e tlemaha ho fetela ho Sechaba ka kotloholo. Ke le tiisetse hore ho qala ka temo ea mariha liqholotso tsena e tlabane pale ea maobane. Kea le leboha Basotho ka kutlo ea lona e matla ka khoehletso ea ‘Muso ea hore Naha ea Lesotho e itlhaletse lijo, ‘me ‘muso o tla thusetsa ka lisebelisuo le mechini esita le ho reka lijo le ho fumanela lihoai limmaraka. ‘Muso o hatetse pele morerong oa ho fetisetsa mechini ea temo le literekere tsa ‘Muso ho lihoai literekeng tsohle.
- 9.3 Ka kopanelo le mokhatlo oa Machaba oa Temo (FAO) malapa a likete li hlano (5,000) a khahlamelitsoe ka lipeo tsa poone Thaba-tseka, Mokhotlong le Qacha’s Nek. Ha Lihoai tse likete tse leshome le metso e mehlano (15,000) tsa Quthing, Mohale’s Hoek, Mafeteng, Maseru, Berea, Leribe le Botha-Bothe tsona li khahlamelitsoe ka peo ea linaoa tse etsang boima li-ton tse makholo a mabeli (200 metric tonnes).
- 9.4 ‘Muso o thakhotse leano la naha la tsoaliso, moo ka khetholoho le kentseng tšebetsong lenaneo la ‘nehe ke u nehe. Lenaneo lena le thusa ho imolla lekhulo ka phokotso ea mehlope ‘me le se le kene tšebetsong Mafeteng, Berea, Botha-Buthe, Mohale’s Hoek, Maseru le Mokhotlong.
- 9.5 Ho fihlela ha joale ke liramo tse 185 tse ntlafalitsoeng tse seng li abetsoe lihoai tlasa morero ona, ‘me morero o mothating oa ho tsoela pele ka tšebetso literekeng tse lateng: Mokhotlong (liramo tse 150; liphooko tse 36), Maseru (liramo tse 217; liphooki tse 69), Mohale’s Hoek (liramo tse 44; liphooko tse 31) le liphooko tse 45 Berea le tse tšeleletseng Botha-Bothe.
- 9.6 ‘Muso o behelletse ka thoko chelete e kaholimo ho limilione tse mashome a mabeli le metso e mehlano tsa maloti (M25 million) sebakeng sa ho khahlametsa lihoai ka lijo tsa liphoofolo tlasa morero oa Ntlafatso ea boea ba Faralane le Seiboko.
- 9.7 Re boetse re phethetse khaho ea likiri tse leshome le metso e tšeleletseng; ra nchafatsa tse leshome le metso e mehlano; ha tse mashome a mabeli le metso e meraro le mothating oa ho qala ho nchafatsoa.

10. Letšolo la thloekiso ea naha

- 10.1 Basotho ba heso bohloeki ke ntho ea bohlokoa haholo me re le Sechaba sa Basotho re ile ra tsebahala ka bona. Ke ka hona ha re kena pusong re ileng ra lumellana le baheso hore re behe taba ea bohloeki ba naha sehlohlolong sa bosebeletsi ba rona. Le tla hopola hore kamora hore re thakhole letšolo lena re ile ra qalella ho hloekisa naha ka bophara mafelo a khoeli e 'ngoe le e 'ngoe. Mafapha a ikemetseng le likhoebo li ithaopile ho kenya letsoho letšolong lena la ho laba-labela Lesotho le lecha le hloekileng.
- 10.2 'Musu o entse melaoana ea letlole la tikoloho ele ho tšehetsa ka lichelete matšolo ohle a sireletsang tikoloho. Ka mor'a tlhokomelo ea hore polasitiki ke eona e silafatsang naha, 'musu o tla kenya haufinyane lekhetho la polasitiki ho fokotsa tšilafatso ea tikoloho.
- 10.3 Ke ipiletsa ho lona hore re emise ho lahlela lithole hohle le ho phutha tsohle moo reka bang teng ka ho ithabisa, kapa ho phomola. 'Musu o ntse o sebetsana le maano amang a tla thusa hore naha ea rona e hloeke. Ha re hopoleng hore bohloeki bo thibela mefuta eohle ea mafu, e bile naha e hloekileng e fana ka seriti se setle, e khahla le hohohela bahahlaoli. Taba ena e ka thusa naha ho theha mesebetsi le boikhollo bofumeng.

11. Litlolo tsa Molao le toantso ea tsona

- 11.1 Basotho ba heso re le 'musu re tšoenyehile haholo ke litlolo tsa molao tse kang bosholu ba liphoofolo, bosholu ba boqhobane, bosholu ba bomeneme, lipolaeano le tlhekefetso. Litlaleho tsa matsatsing ana tse tsoang ka Mokhotlong tsa bosholu, lipolaeano le boiphetetso ha li jese litheohelang.
- 11.2 Ele ho arabela qholotso ena, 'musu o ile oa theha le ho thakhola lebotheo la tšebetso ea toantšo ea litlolo tsa molao "*Operations Restore Hope*". Letšolo lena le kopanetsoe ke Sepolesa, Sesole le Mautloela, 'me le kene tšebetsong ka la 19 Mphalane 2020. Ho tloha ka nako eo ho fihlela ka la 21 Tšitoe 2020, re motlotlo ho phatlalatsa likatleho tse latelang.
- 11.3 Re fumane likhomo tse makholo a mane a metso e meraro (403), linku tse lekholo, mashome a mabeli a metso e supileng (127), lipoli tse mashome a mararo a metso e 'meli (32), litonki tse mashome a mane le motso o le mong (41), le lipere tse mashome a mararo a metso e supileng (37). Ho boetse ho fumanoa lithunya tse nyane tse mashome a mararo (30), le sethunya se seholo se le seng (1). Ho fumanoa hape mahlaahlela a makholo a mabeli, leshome le metso e 'meli (212), le mabokose a mashome (40) a mane a matekoane. Ho boetse ho fumanoa likoloi tse supileng (7), lithipa tse mashome a mararo a metso e supileng (37), likoto tse peli (2), melamu e robeli (8), le marumo a mararo (3). Oele Basotho!
- 11.4 'Musu o boetse o tšoare batho ba mashome a robeli le motso o le mong (81), me ba leshome le motso o le mong (11) ba ahlotsoe, ha ba mashome a mabeli a metso e 'meli (22) ba emetse linyeoe.

- 11.5 Basotho ba heso re lebile kae ka liketso tsee tse malimabe tse utloisang Basotho ba ha bo rona bohloko! Ha re bua tjena Basotho ba bang ba ikeme lepaketla ba ithera bora ba ho bolaeana ka 'sehloho.

12. Lithuso tsa ntšetsopele ea Sechaba

- 12.1 Sechaba sa heso, ke motlotlo ho phatlalatsa hore Lesotho le se le na le boemeli ba “African Committee of Experts on the Rights and Welfare of the Child” leng setsi sa Selekane sa Kopano ea Africa (African Union) seo sepheo sa sona sa mantlha e leng ho sireletsa litokelo tsa bana le bophelo bo botle. Ke ile ka etsa puo ho baetapele ba Selekane sa Kopano ea Africa (African Union) ka tšireletso ea litokelo tsa bana le ho amohela mona Lesotho litsibi tse tsa Africa tse sebetsanang le litokelo tsa bana.
- 12.2 Nakong ena ea Covid-19, 'muso o fane ka lithuso ho mafapha ka ho fapakana a sechaba, ka litsela tse latelang: re ekelitse ka likete tse supileng Basotho ba fuoang lithuso ke Lekala la Ntšetsopele ea Sechaba. Kakaretso ea lenane leo 'muso o le fihletseng lithuso ke likete tse atabelang mashome a mane le metso e robong (48,809). 'Muso o boetse o fane ka lithuso tsa lijo, malapeng a atemetsang likete tse mashome a mabeli le metso e meraro (22,600) ka hare ho naha le a likete tse leshome le metso e 'meli (12,000) a Basotho ba phelang naheng ea Aforeka Boroa. Ho feta mona, 'muso o fane ka likoloeana tse mashome a mahlano a metso e 'meli (52 wheelchairs), le melangoana e lekholo (100) ea batho ba nang le bokooa ba pono.
- 12.3 'Muso o pharalalitse tšebeliso ea mokhoa oa marang-rang oa ho fetisetsa lithuso sechabeng (National Information System for Social Assistance (NISSA)), 'me malapa a likete tse mashome a robong a literopong a se a ngolisitsoe. Mokhoa ona oa ho ngolisa sechaba o tla sebelisoa ho thusa ho khetha batho ba lokeloang ke lithuso ka tsela e nang le ponaleto.

13. Merero e meholo ea ntšetsopele

Metsi

- 13.1 'Muso o thakhotse morero o moholo oa phepele ea metsi Hlotse le Maputsoe le libakeng tse mathoko a tsona ho kenyeletsa Ha Lesiamo, Khanyane, Mpharane, le tse ling moo ho tlang ho una molemo kakaretso ea sechaba se fetang likete tse lekholo (115,000) le lifeme tse hirileng sechaba seka etsang likete tse leshome le metso e meraro (13,000).
- 13.2 Re koala selemo re phethetse leano le reng metse eohle eo lipeipi tsa metsi li fetang ho eona e hokeloe phepelong ea metsi 'me mosebetsi ona o tla qala ka metse eohle eo lipeipi tsa letamo la Metolong li fetang teng. Ka mokhoa o tsoanang metse e tla angoa ke phepele ea metsi a lebang lifemeng tsa Ha Belo le eona e tla kenyeletsoa phepelong ea metsi.

Motlakase

- 13.3 Ho anetsa motlakase naha ka bophara, 'muso o thakhotse setsi sa phehlo ea motlakase oa matla a letsatsi Ha Ramarothole seterekeng sa Mafeteng 'me setsi sena se lebeletsoe ho

hlahisa motlakase o kalo ka 70MW ha o phethetsoe nakong ea lilemo tse tharo. 'Muso o phethetse morero oa motlakase metseng 'Melikane seterekeng sa Qacha's Nek, Ha Makopela seterekeng sa Mafeteng le Matlakeng seterekeng sa Leribe.

- 13.4 'Muso o qapile leano la hore Lekala la Matla le hokele likolo tsohle le litsi tsohle tsa bophelo ka morero oa hore baithuti ba fuoe thupelo ka marang-rang le hore meriana e bolokehe litsing tsa bophelo ka tšebeliso ea lihatsetsi.

Litsela

- 13.5 Kahong ea litsela, 'Muso o ntse o tsoela pele ho aha litsela tsa letšoana tsa Mpiti-Sehlabathebe le Marakabei-Monotša, 'me litsela tsena li lebeletsoe ho phetheloa lilemong tse peli tse tlang. 'Muso o atlehile ho aha marokho a maoto a leshome le metso e tšeletseng, ha a tšeletseng a tla phetheloa ka khoeli ea Tlhakubele isao. Marokho ana a literekeng tsa Leribe, Berea, Maseru, Thaba-Tseka le Mokhotlong.
- 13.6 'Muso o butse ka molao setsi seo ho sona ho fumanoang litšebeletso tsohle tsa lipalangoang sebakeng se le seng ha Foso, Berea. Sebakeng sena ho fumaneha litšebeletso tse lateng: ngoliso ea makoloi, phumantšo ea li laksense, lipolomiti, linomoro tsa makoloi, le tšebeletso ea sepolesa le tefo ea lekhetho tseo bobeli li hlokahalang ngolisong ea makoloi. Ke le hopotse Basotho hore mehleng ea pele ha motho a ngolisa koloi o ne a tlameha ho ea libakeng tse tharo tse qaqolohaneng, empa kejeno tsohle li etsahala 'ngqa e le 'ngoe. Ho sa le joalo, 'muso o khonne ho fana ka linomoro tsa makoloi tse ncha tse likete tse leshome (10,000) ho tloha ka Loetse 2020.

Paballo ea Mobu le Makhulo

- 13.7 'Muso ka Lekala la Meru, Makhulo le Paballo ea mobu o lemme lifate tsa litholoana tse fetang makholo a mabeli a likete (224,000) le tse mashome a mabeli a likete (20,000) tsa morara, 'me Basotho ba likete tse leshome le motso o le mong (11,000) ba fuoe mosebetsi oa paballo ea mobu naha bophara. 'Muso boetse oa sebetsa le sechaba ho theha mekhatlo ea phuliso e lekholo le mashome a robong (194) ka sepheho sa ho baballa mobu le ho laola lekhulo.

Lirafshoang

- 13.8 'Muso o hlophisitse melaoana ea ho thibela bosholu ba litaemane, 'me Basotho ba fuoe tumello ea ho tlaleha litaemane tse matsohong a bona 'musong. Ho feta mona, 'muso o fetisitse molao oa ho theha setsi sa ho betla le ho rekisa litaemane ka hare ho naha. 'Muso boetse o tekenetse tumellano ea tšebeliso 'moho le Junifesithi ea Witwatersrand holima maano a lipatlisiso tsa mobu le majoe, ka sepheho sa ho ntlafatsa tšebetso litabeng tsa lirafshoang.

Kholiso ea likhoebo le theho ea mesebetsi

- 13.9 Basotho ba heso le ha e le mona seoa se Covid-19 se re amme ha kana, Naha ea Lesotho e atlehile ho hohela bo ramatsete ba Machaba le ba Basotho mafapheng a fapaneng ka hara naha. ‘Musso o nolofalitse botseteli ka ho theha Lekhotla la Matona (Investment Promotion Committee) le shebanang le ho tlosa likhoqetsane tse sitisang botseteli ka hara naha. ‘Musso o boetse oa theha lefapha le bophethahatsi (Delivery Unit) le Boikarabello (Accountability) tlasa office ea Tona-Kholo ho atlehisa tšebetso ea botseteli le phetisetso ea litšebeliso sechabeng. Likhoeling tsena tse supileng re bile le batseteli ba kentseng chelete e fetang bilione ea maloti (M1.6 billion), ‘me ba theha mesebetsi e fetang likete tse supileng (7,240). Ruri re leboha Molimo ka katleho tsena tseo re li fihletseng likhoeling tsena tse supileng feela!!!
- 13.10 ‘Musso o ithukhubelitse ka thata ho atlehisa likhoebo tsa Basotho. Re fane ka chelete e kalo ka limilione tse fetang makholo a mane (M410 million) ho tšehetsa likhoebo tsa Basotho ka ho bebofatsa kalimo ea chelete libankeng (Credit Guarantee) tse Lesotho.

Melao

- 13.11 Ele ho tiisa metso ea puso, ‘Musso o thontse Mookameli oa Lekhotla le phahameng (Chief Justice) le Baokameli ba setsi se ikemetseng sa likhetho (IEC). ‘Musso o boetse oa fetisa melao le melaoana a latelang:
- (a) Molao oa ho beha thepa e tsamaeang paneng (Security Interest in Movable Property Act);
 - (b) Sehlomathiso sa molao oa baphaphathehi ba litlolo tsa molao (Fugitives Offenders (Amendment) Act);
 - (c) Sehlomathiso sa molao sa tumellano ea tšebeliso ‘moho litlolong tsa molao (Mutual Legal Assistance in Criminal Matters (Amendment) Act);
 - (d) Sehlomathiso sa molao sa thibelo ea bobolu le bomenemene le litlolo tsa molao khahlanong le moruo (Prevention of Corruption and economic Offences (Amendment) Act); le
 - (e) Sehlomathiso sa molao oa litsi tse ikemetseng tsa tšireletso (Private Security Officers (Amendment) Act);

Tšebeliso ‘moho le Naha ea Aforeka Boroa

- 13.12 Ho ntlafatsa likamano tsa Naha ea Lesotho le Aforeka Boroa re ile ra kopana le Mopresitente oa naha eo hang ha re kena pusong. Ha morao ‘Musso o ile oa tekenela tokomane ea maqhama a tšebeliso ‘moho pakeng tsa linaha tsena tse peli. Mohato ona oa tšebeliso ‘moho o reretsoe ho nolofaltsa Basotho mokhoa oa ho tsamaea le ho phela Aforeka Boroa esita le ho sebetsa naheng eo ka bolokolohi. ‘Musso o entse qeto ea hore

hohle moo re nang le boemeli naheng ea Aforeka boroa re be le bahlabolli (Social Workers) le litsibi tsa litaba tsa bosebetsi (Labour Officers) e le ho khahlametsa Basotho ka litšebeletso tsa mantlha

14. Takaletso ea Mahlonoholo a keresemese le katleho selemong se tlang

- 14.1 Ke qetele ka ho tiisetsa Basotho hore re le ‘muso re sebetsa ka matla ho bona hore khotso le botsitso li ba teng kahare ho naha molemong oa kholiso ea moruo, ntlafatso ea phano ea litšebeletso, le ntlafatso ea bophelo ba rona bohle, kahona ke ipiletsa ho Sechaba ho se itumelle ho fetisa kapa ho phatlalatsa litaba tsa mafosisa tse ka amang khotso le botsitso ba puso. Ke rata ho tiisetsa Basotho hore ‘muso o ntse o tsitsitse me o sebetsa ka matla hore ha nako ea ona e fela ka 2022 o bo fihletse katleho kholisong ea moruo, ntlafatsong ea bophelo ba Sechaba sa Basotho le morerong oa tlhopho bocha.
- 14.2 Khoeling ena e holimo, Motlotlehi o ile a khakola ketekelo ea lilemo tse makholo a mabeli naha ea Lesotho e thehuae ke Morena Moshoeshe ka therisano le Morena Lethole. Taba ena e tlameha ho ba kholo haholo likelellong tsa rona le hore e tle e re hopotse semelo le boleng ba rona re le Basotho. Sechaba sena sa Basotho se thehuae holima khotso, lerato, therisano ka litaba tsa puso, mahlale, le bohloeki. Re luleng re ikhopotsa taba tsena ka nako tsohle.
- 14.3 Ke fera puo ea ka ka ho lakaletsa Basotho bohle ketekelo e monate ea Keresemese ‘me ke kopa Molimo a tle a le atlehise linthong tsohle selemong se tlang. Molimo a le fe matla, lerato le tšepo. Le hopole hore ho lehlohonolo letsoho le fanang. Le tle le lebohe Molimo linthong tsohle. Le ha e le mona re oetsoe ke seoa sena sa Covid-19, Molimo oa rona o tla re pholosa; u tla re baballa. Molimo o boloke Lesotho le Basotho.

KHOTSO, PULA, NALA